

դին հեռացան 'ի Կամենիցէ, այլ Հայոց չեն թողուլ ելնելու, որով և նոցա մայրապետք կը մնան 'ի քաղաքին: Երկու ամիս հոն մնալէն վերջը, առանց հալածանք կրելու 'ի յաղթականաց, հրաման կ'ելնէ՝ որ հեռանան քաղաքէն. քսութիւնք եղած են պատճառը... 'ի թիւս Հայոց կային 14 մայրապետ կուսանք: Սոքա ամօրեայ մի ճանապարհորդելով կը հասնին յափն ծովուն, և կը մտնեն երեք նաւերու մէջ, յորոց մին 'ի ճանապարհին կ'ընկղմի, և այլ երկուքն կը հասնին 'ի Սիգուպու քաղաք Տաճկաց: Անճար պանդուխտներն անմարդի կը գտնեն քաղաքը, զի նախընթաց տարւոյն ժանտախտը ջարդել էր անոր բնիկիչքը, և ողջ մնացողները թողել գնացել էին քաղաքը. սակայն Սուլթանին հրամանն այն էր՝ որ Հայք ներքին գաւառները չգաղթին: Հոն կ'անցընեն բովանդակ ձմեռը, գարնան (1673) կ'անցնին 'ի Մակեդոնիա գաւառն, ուր և ազատ շունչ կ'առնուն: Կը շինեն իրենց համար եկեղեցի, ուր կը զետեղեն հետերնին բերած Հրաշագործ պատկերը: Այլ սէր Լեհաստան (երկրորդ) հայրենեաց կը մաշէ նոցա սիրտը: 1675ին կ'որոշեն մայրապետք լռելեայն՝ դառնալ վերստին 'ի Լեհաստան: Յաջողութեամբ կը հասնին 'ի Պուքարեշտ, ուր Ուլխաց իշխանուհին իրեն մօտ կը պահէ զնոսա տասն ամիս: 1676ին կը հասնին 'ի Սգանեսլաւով քաղաք, Իլվովի Թորոսեւիչ արքեպիսկոպոսին խնդրանօք, կ'անցնին մայրապետք 'ի Սթանեսլաւովէ յԻլվով, ուր Հայոց գերեզմանատան անշուք վանքին մէջ կը պատըսպարին: Այն միջոցին Կամենիցէն ելնող մայրապետաց թիւը երեքի հասած էր. զի նոցանէ երեքն Հայոց լեզուն չգիտնալնուն պատճառաւ՝